



Tir Yimiyim


www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



TAPAK 7

Nice Defender Youcef nem ita 8 atema tenokdangba agütsü

Nisung 84 poksetba atema Iran leniri telangzüba agütsütsü nangzük



VOL. XXI NO. 82 (ADOK 82) DIMAPUR ROGONÜ (FRIDAY) ANJETI (JANUARY) 05, 2024 ₹ 5.00

India aser Nepal tsüngta tongtipang tezüngzüktep kar agiogo

Kathmandu, Aenjeti/January 04 (Agencies): Brehostibarnü India nunger External Affairs Minister S Jaishankar aser Nepal Foreign Minister NP Saud tsüngta senden amenba mapang India aser Nepal tsüngta tongtipang tezüngzüktep kar agia liasü. Minister ana tsüngta senden amenba mapang linük ana tesendaktep, shishilempaba, lenmang tesendaktep aser defence tsütsü amalitep indang onüktem jembia liasü.

"Linük ana tsüngta yimtenren tsütsü tesendaktep, shishilempaba & rongsenketzüng tesendaktep, ali, rail aser air connectivity projects, defense aser security nung amalitep, aluyimba, energy, power, water resources, disaster management, tourism, civil aviation, people-to-people & cultural exchanges aser terenlok asoshi külemi inyaksü indang jembia," ta Jaishankar-i X nung post asü.

Jaishankar-i Brehostibarnü Nepal tonga aruba ya 2024 küm asoshi mezüngbuba bendang lima semdangba alitsü aser 7th India-Nepal Joint Commission senden nunga dena liasü. Jaishankar lia Nepal indang Energy Secretary Gopal Sigdel aser India indang Energy

Secretary Pankaj Agrawal nati taruba küm ter tsüngta Nepal nungi India dangi electricity 10,000 MW yoktsü asoshi tezüngzüktep ka zülutepa liasü.

Taoba küm May 31 nungi June 3 tashi Ato Kilonser Pushpakamal Dahal Prachanda-i India semdangba mapang electricity export atema linük ana tsüngta tangatettep kati arua liasü.

Tang India-i Nepal nungi electricity 450 MW agir. Nepal-i ayong tulu nung hydropower projects yangluba nung India-i yaria lir aser ano aika nung yaritsü lir.

Brehostibarnü senden amenba mapang linük ana tsüngta High Impact Community Development Projects, Cooperation in Renewable Energy Development, Munal Satellite aser 5th tranche of post-Jajarkot earthquake relief supply agütsütsü indang züngzüktepa liasü.

Kasa mapang linük ana lungjemer arütsü alema transmission line asem semzüka liasü.

Jaishankar-i Nepal Tir Ramchandra Paudel aser Ato Kilonser Pushpa Kamal Dahal Prachanda na ajurua tesendaktep balala atema jembishinüa liasü.

Mizoram CM Lalduhoma-i PM Modi ajuru



Mizoram CM Lalduhoma & Ato Kilonser Narendra Modi

New Delhi, Aenjeti/January 04 (Agencies): Mizoram indang chief minister Lalduhoma-i January 4, 2024 nü New Delhi nung Ato Kilonser Narendra Modi ajurua liasü.

"Misoram terenlok aser tejakleni aotsü asoshi lungjemer inyakba nung tashi itshitsü pelar," ta Mizoram CM Lalduhoma-i ashi.

Tena tsüngta nungdak balala jembia liasü ta Mizoram CM-isa ashi.

January 3 nü Mizoram CM Lalduhoma-i New Delhi nung External Affairs Minister S Jaishankar ajurua liasü.

Lalduhoma aser S Jaishankar ya Indian Civil Services nung tenzükba mapang külemi inyaka liasü.

Mizoram CM Lalduhoma aser External Affairs Minister S Jaishankar ya 1977 Indian civil services batchmates lir.

Mizoram CM Lalduhoma ya Indian Police Service (IPS) nung inyaka liasü aser S Jaishankar ya Indian Foreign Service (IFS) officer ka ama inyaka liasü.

"Mizoram chief minister Lalduhoma ajuruba asoshi kanga pelar. Küna kasa mapang nung sorkar tenzük aser külemi training agi," ta EAM Jaishankar-i ashi.

"Tejen tembar tanaben ajuruba ya jangratemtsü lir," ta Mizoram CM-ia ashi.

Lenir ana ya Ministry of External Affairs aser Mizoram sorkar tsüngta tesendaktep tali akangshitsü atema jembishinüa liasü.

Free Movement Regime agienba anema nokdaksüla: RPP

Dimapur, Aenjeti/January 04 (TYO): Tribal tem aliba Northeast states aser Naga nunger asoshi küm tasen terata nung tenzükogo. India-Myanmar arütsü anatsülen alirtem visa medeni kilometre 16 tashi aita senzütsü melaba Free Movement Regime (FMR) tembangtsü central sorkari telemteba agiba ya taoksatsü aser Naga nunger asoshi saksalemtsü osang ka lir, ta Rising Peoples Party (RPP) ajanga January 3, 2024 sangdong ka nung ashi.

Visa dener ang senzütsüba den külemi sorkari arütsü nung high security fencing inoktsü nokjidong lir. Naga nunger ya litsü-lika telesa balala nung alir aser iba sentong tasenba ya

ajanga Naga nunger tsüngta telesa ang tali adokdaksütsü. Anungi asenok tali telesa adokdaksütsü nükjidong nung sentong/tasa yangluba asenoki anema nokdaksüla, ta RPP sangdong ajanga ashi.

Naga nungera süang, mesüra Zo-Kuki nungera süang, akhi mapang nungi arütsü alema nüburtem libalirua aruba ama lidaksütsü Ato Kilonser Modi dang ajungshir. Arütsü anatsülen aliba Naga nunger nungdakba aser tejangraba ama 1963 küm state kumtetba sülen FMR balala amshia arur aser item nungdakba akumtsübotsüla aser wazüka ayutsüla, ta ashi.

Central sorkari FMR agientsü asoshi Manipur Chief Minister

Biren Singh dak tashi aser sempet maliba aser paa communal policy tem tenüng mamshitsüla.

2017 küm Burma sepaitemi Noklak district kübok Pangsha anasa international border atsü dangtsü sentong yanglu, saka nüburtemi anema nokdakba mechi iba sentong mapa kuma meinyak.

Free Movement Regime agientsü jembiba anema NDPP-BJP coalition government ajang-ajanga nokdaksüla, aser nungdak dang süra, MLA 60 pronglai Ato Kilonser mesüra Home Minister ajurua atsü atsütsü khenyongi memelatsü ta Naga nunger taginüba metetdaksütsüla, ta Rising Peoples Party ajangasa ashi.

Assam-Nagaland arütsü nung totzü atsütsü mechi yimtenren ken o atsülanger: Tokheho Yephthomi

Dimapur, Aenjeti/January 04 (TYO): Assam-Nagaland arütsü nung aliba totzü atsütsü asoshi lenmang bushitsü mechi Delhi nung aliba lenirtemi Naga nunger yimtenren ken o akok tashi atsülangtsü tebilemba lir, ta Nagaland nungi Lok Sabha MP Tokheho Yephthomi-i ashi.

Kobi melie India nung totzü yangluba shilem 64 Northeast states tem nungi arütsü aser yangji Nagaland malitsü, ta Yephthomi-i sangdong ka nung ashi.

Tang Indo-Naga yimten ken o tejembidak aliba mechi Nagaland nung totzü bushia atsütsü maparen anendaka lir ta pai ashi.

Tesüiba küm ter tsüngta totzü atsüba nungi revenue nung Assam sen crore 18,000

ajanzüka lir ta ashi.

"Asen kidangertem rongsenketzüng tsütsü tejakleni aodang asenok Naga nunger Article 371-A aser yinten ken o mechi terenlokba nung atsüdaka ayur," ta pai ashi.

"Terenlok aser rongsenketzüng ainba nung linük aser alima memenepeba atema asenoki komarka jembiyonga, item ajak ya tatem kati maruteti aliba yimtenren ken o aser lenla ajak nung sen tashi amshiba ajanga lir."

Nagaland-Assam arütsülen totzü aliba tesem 35 nungi tenet - Champang, Hozukhe, Nikihe, Pishikhu, Tokishe, Khoponala aser Toshezu - ya Nagaland nung lir, ta Yephthomi-i ashi.

"Article 371 (A) aser Naga

political negotiations mechi item oil fields kata nunga totzü matsüteter," ta pai ashi.

Assam den totzü atsüba nungi royalty lemsateptsü asoshi tezüngzüktep tatem kuma merenemdang Nagaland sorkari Nagaland nung totzü aliba jangjatsüla, ta pai ashi.

Nagaland nung nütsüng yongsük shilem 60 dak tema arishi küm 25 teküpok lir, tetetzü parnok ajak ya Naga political negotiations dang tanubo lir ta ashi.

"Anungji rongdenketzüng tsütsü dangar dak metaloka malitsü mesüra maneni yimten temeden asoshi jembitsü atema Naga nungeri telemteba agitsü mapang tongogo," ta Yephthomi-i ashi.

2024 küm Rajya Sabha züngsem 68 retire asütsü

New Delhi, Aenjeti/January 04 (Agencies): Union minister toku densema Rajya Sabha züngsem 68 kümsük takum tembanger, anungji political party balala nungi lenirtem Parliament indang Upper House nung küm trok kümsük asoshi tenük yokba mapang lir.

Menden tazüng 68 nungi Delhi nung menden asem asoshi elections agitsü sangdonga lir, kong AAP lenir Sanjay Singh, Narain Dass Gupta aser Sushil Kumar Gupta nunger January 27 nü par kümsük tembangtsü. Sikkim nung Rajya Sabha menden ka aliba atema elections agitsü sangdonga lir, kong SDF züngsem Hishey Lachungpa ya February 23 nü retire asütsü.

Railway Minister Ashwini Vaishnaw, Education Minister Dharmendra Pradhan, Environment Minister Bhupendra Yadav, Health Minister Mansukh Madaviya aser taoba ato kilonser Manmohan Singh densema lenir 57 indang kümsük April ita tembangtsü.

Menden tazüng timtiba ya

Uttar Pradesh (menden 10) alitsü, iba sülen Maharashtra aser Bihar nung menden trok-rok, Madhya Pradesh aser West Bengal nung menden pongu-ngu, Karnataka aser Gujarat nung menden pezüzü, Odisha, Telangana, Kerala aser Andhra Pradesh nung menden asem-sem, Jharkhand aser Rajasthan nung menden ana aser Uttarakhand, Himachal Pradesh, Haryana aser Chhattisgarh nung menden ka-ka alitsü.

Nominate asüba züngsem pezü July ita retire asütsü.

Maharashtra nungi Minister of State for External Affairs V Muraleedharan, MSME Minister Narayan Rane, taoba union minister Prakash Javadekar, Congress züngsem Kumar Ketkar, NCP züngsem Vandana Chavan aser Shiv Sena (UBT) züngsem Anil Desai nungertem kümsük agi atongtsü.

Madhya Pradesh nungi Dharmendra Pradhan, Minister of State for Information and Broadcasting L Murugan, BJP züngsem Ajay Pratap Singh aser

Kailash Soni aser Congress züngsem Rajmani Patel nungertem Upper House of Parliament kümsük agi tonga anentsü.

West Bengal nung Trinamool Congress züngsem Abir Ranjan Biswas, Subhasish Chakraborty, Mohammed Nadimul Haque aser Santanu Sen, aser Congress züngsem Abhishek Manu Singhvi nungertem kümsük agi atonger.

Bihar nung RJD züngsem Manoj Kumar Jha aser Ahmad Ashfaq Karim, JD (U) züngsem Aneel Prasad Hegde aser Bashista Narain Singh, BJP züngsem Sushil Kumar Modi aser Congress züngsem Akhilesh Prasad Singh nunger Rajya Sabha nung kümsük abensar.

Uttar Pradesh nung BJP züngsem Anil Agrawal, Ashok Bajpai, Anil Jain, Kanta Kardam, Sakaldeep Rajbhar, GVL Narasimha Rao, Vijay Pal Singh Tomar, Sudhanshu Trivedi aser Harnath Singh Yadav aser Samajwadi Party züngsem Jaya Bachchan nunger anentsü.

Congress party sentong nungja 'Bharat Jodo Nyay Yatra' agi melener



New Delhi, Aenjeti/January 4 (Agencies): Manipur nungi Mumbai tashi Congress party sentong koba January 14 nü tenzüksü lir iba nungja 'Bharat Jodo Nyay Yatra' agi melenogo. Mezüngbuba iba sentong nungja ya 'Bharat Nyay Yatra' ta agütsür liasü. 'Bharat Jodo Nyay Yatra' ya tang mepetmesü nung aliba

Manipur state yimtiba Imphal nung January 14 nü 12 ako nung tenzüksü Congress party indang 'Bharat Jodo Nyay Yatra' ya taoba party tir Rahul Gandhi-i anir agitsü. Manipur nungi Mumbai tashi aoba mapang Rahul Gandhi-i anogo 66 tsüngda kilometer 6700 jajatsü. Northeast nung iba sentong ya

Manipur, Assam, Nagaland, Arunachal Pradesh aser Meghalaya nunga agitsü. Iba yatra yagi Uttar Pradesh nung kilometer 1000 ayimjemsü aser Assam nung kilometer 883 ayimjemsü. Assam nung Rahul Gandhi-i anogo ti tsüngda district 17 ayimjema senzütsü sentong yanglua lir.

Lok Sabha election atema JD-U-i candidate sangdongogo

Itanagar, Aenjeti/January 4 (Agencies): Janata Dal-United (JD-U)-i, 2024 Lok Sabha elections nung Arunachal West menden atema tokteptsü asoshi parnok indang candidate sangdongogo. Osang ajanga ashiba agi, JD-U-i Arunachal Pradesh nung Lok Sabha menden atema parnok indang candidate ya INDIA partner shinga dena tongtepratep mesüi sangdongogo. Kasa mapang nung parnoki iba telemetba agiba ya JD-U-i Congress dak tai tongloksüogo.

JD-U-i 2024 Lok Sabha election nung Arunachal Pradesh (West) parliamentary constituency nung parnok indang candidate asütsü atema party indang Arunachal Pradesh unit tir Ruhi Tangung shimogo. "Arunachal Pradesh nung state unit tir Ruhi Tangung, 2024 Lok Sabha election nung Arunachal Pradesh (West) parliamentary constituency atema JDU candidate asütsü shimogo," ta JD-U general secretary Afaque Ahmad Khan-i ashi. Maneni JD-U-isa,

Arunachal Pradesh assembly elections nung tokteptsü atema telemetba agiba sangdongogo, koba Lok Sabha election agiba mapang kasa nung agitsü. "Ozü party Arunachal Pradesh assembly elections nunga tokteptsü, koba Lok Sabha election agiba mapang kasa nung agitsü lir. JD-U national tir Nitish Kumar tetuyuba dak ajemdaker iba osang ya agütsüogo," ta Khan-i ashi. Temetetsü jaki JD-U ya tang mezüngbuba Arunachal Pradesh nung Lok Sabha election nung tokteptsü lir.

Arunachal Angh-i hydro & tourism sector dak rangloksü ayongzük



Arunachal Pradesh Angh Lieutenant General (retired) KT Parnaik aser deputy chief minister Chowna Mein na sensaksemba mapang tangokba noksa nung angur.

Itangar, Aenjeti/January 4 (Agencies): Arunachal Pradesh Angh Lieutenant General (retired) KT Parnaik-i Brehostibarnü (January 04), state nung hydropower aser tourism sectors dak tali rangloker inyaksü ayongzüka liasü. Arunachal Pradesh Angh Lieutenant General (retired) KT Parnaik-i ashiba agi, sector anaprongla ya renlokyonga aotsü atema lenmang sadema lapoka lir. Raj Bhawan nung state indang deputy chief minister Chowna Mein den senden ka amenba mapang Arunachal

Pradesh Angh-i iba olen ya lemsatepa liasü. Official sangdong ka ajanga ashiba agi, Parnaik shibai tawa Arunachal Pradesh nung Changlang district kübok kinük nung aliba Vijoyanagar tesem semdanga liasü, pai solar lighting amala non-conventional energy resources ajungkettsü shidanga liasü. Ajisüaka paisa, iba amala inyakyimtem benoka inyakba mapang state nung aremshirur aser süngtonglitong dak takok tashi mekongshitsüla, ta ashi. Maneni Arunachal Pradesh Angh-i state nung tourism infrastructure atsülangshitsü

atema ayongzüka liasü. "Onoki hydropower aser tourism renloka aotsü atema lenmang sadema lapoka aliba indang sensaksemogo aser talisa eco, adventure aser religious tourism ajungkettsü atema sensaksemogo," ta Arunachal Pradesh deputy CM Chowna Mein-i Angh Parnaik den senden amenba sülen ashi. Paisa, "maneni Vijaynagar amala tesem nung sector, kiwi, naring aser apple amala horticultural crop tem tsünütsü atema sensak asemba den non-conventional energy resources ajungkettsü atema sensaksema liasü," ta ashi.

Nagaland Govt. 2024 calendars aser diary DIPR nung angutsü

Dimapur, Aenjeti/January 4 (TYO): Directorate of Information & Public Relations (DIPR)-i sangdong ka ajanga, 2024 küm atema Nagaland Government Calendar aser Diary tem DIPR office nung angutsü ta metetdaksüogo. Calendar aser Diary tem ya office mapang meshitetsü, ta metetdaksüba den complimentary copy tema angutsü ta metetdaksüogo.

AR-i sentong balala ayongzüka agi



Dimapur, Aenjeti/January 4 (TYO): Assam Rifles-i ayongzüka January 3 nü Laju yimtsüng nung International Mind body Wellness Day dak sendakba nung awareness lecture ka agüja liasü. Iba sentong nung Laju yimtsüng lenirtem densema yimdak alir 100 shi-i shilem agia liasü. Sentong nung pei sasa pei anepalutsüba, nüburtem yongtsü nung pei temang anema toksütsü atema lenla ajak nung tebilemdangba lia jenjang tapet agitsüba aser iba den ajak den liromedema aser tesunep nung alitsü atema libaliro tajung benoka inyaksangshiba dak sendaka nung tangazükba agüja liasü. Iba amala sentong tajung ayongzüka katsüba atema

yimdaklirtemi Assam Rifles dang kanga pelaba lemsatepa liasü. Kasa mapang nung Assam Rifles-isa January 3 nü Ghaspani kübok Unit War Memorial nung naro toksüba sentong ka ayongzüka agiogo. Iba naro agütsüba sentong ya Rfn Namal Kanti Barman tenüng nung agi, shibai 1997 küm January 3 nü duty nung aliba mapang Thoubal Bazar, Manipur nung pa taküm bendanga agüja liasü. Iba sentong nung Assam Rifles ktdangsurtem aser sepaitemi shilem agi aser Barman-i pa taküm koma bendanga agütsü iba indang metetdakja liasü. Pa tasü aitba aser bendanga agüja tenzüka ajanga sepaitem ajak maneni ajungmesotsü.

Jorhat nung super speciality hospital ka amenoktsü: Keshab

Guwahati, Aenjeti/January 4 (Agencies): Golaghat, Assam kübok Dergaon tesem nung gari tsüktepba lendong ka ataloka nisung 12 tashi taküm samaba sülen Health Minister Keshab Mahanta-i ashiba agi, sorkari Jorhat Medical College and Hospital (JMCH) nung super speciality hospital ka amenoktsü. Local temi, January 3 nü lendong nung takoksa ajurutem ya JMCH nung medical facilities peria maliba ajanga Guwahati nung Gauhati Medical College and Hospital-i anir aotsüsa aküm ta ashishia liasü. Health minister den sensaksemba mapang local temi ashiba agi, JMCH nung medical facilities tem dak sendakba nung tashishitsü aika liasü, koba ita aika kecha jenjang magi arudar. Iba tesem nung alirtem rongnungi lenir kati ashiba agi, Magnetic resonance imaging (MRI) machine ita trok tashi inyaksangshi masür aser nüburtem MRI agitsü atema private clinic kati aotsüsa akümer kong sen aika agir.

Ken o balala asüngdangba mapang minister-i ashiba agi, iba amala mesükba ken o bentetsü atema parnoki inyakdar, saka mapangbo lateta metoktsüteter. Minister-isa, international jenjang nung inyakyim kar inyaksü aliba ajanga mozükidang hadirtem tajungba amenoktsü mesüra yanglushitsü atema mapang agir, ta ashi. Maneni Mahanta-i, JMCH nung super speciality hospital unit ka amenoktsütsü atema sorkari asadangdar, ta ashi. Pai ashiba agi, itasen kwi meshidir meshiaka sorkari tangalen nungi doctor tem anir arutsü atema renema lir. Ajisüaka minister-i hadirtem raksar aliba aser facility tem peria maliba ya koda bentetsü, iba indang osang tejangja ka magütsü. Iba tesem nung alir kati ashiba agi, parnok nem tenangzükbabo aika agütsür saka ken o bo mebentetsü. Minister-i aiben, parnoki ken o sensaksemdar ta shia arudar, ajisüaka tebilemstütem koda bentetsü iba indangbo mashir.

YSR Telangana party tentetla, YS Sharmila-i Congress nung aden



January 04, 2024 nü AICC headquarters, New Delhi nung Congress party general secretaries/ in-charges, Pradesh Congress Committee (PCC) Tirtem aser Congress Legislative Party (CLP) lenirtem senden nung Congress Tir Mallikarjun Kharge, Rahul Gandhi, Priyanka Gandhi Vadra, KC Venugopal aser tangartem tangokba noksa nung angur.

New Delhi, January 04

(Agencies): Congress party-i tesüiba küm ka tashi YSR Telangana party tentetla, YS Sharmila den tongtepratepa aruba sülen tesüsa Brihostibarnü lai Congress party nung denogo, ta osang ka ajanga metetdaksü.

Taküm Lok Sabha election agitsü lia Sharmila-i Congress nung adenba ajanga Andhra Pradesh state nung Congress jenjang tajungba akümtsü.

YS Sharmila ya taoba mapang Andhra Pradesh chief minister, asür YS Rajasekhara Reddy'er jala aser tang Chief Minister teinyakdak, YS Jagan Mohan Reddy'er aianu lir.

Brihostibarnü New Delhi nung lai Congress nung aden. Iba sentong nungji Congess Tir Mallikarjun Kharge aser Rahul Gandhi na densema party nung lenirtem aika liasü.

Sharmila-i YSR Telangana party tenteta liasü; iba party ya Andhra Pradesh nung recognised masüba regional party ka lir. 2021 küm July ita nung lai YSR Telangana party tenteta liasü, ajisüaka tang tashi nungbo state assembly aser Parliament naprongla nung iba party nungi züngsem ka danga mali.

Sharmila tebu, YS Rajasekhara Reddy ya 2008 küm helicopter tsükokba lendong nung asü. Reddy

süadokba sülen Congress-i K Chandrashekar Rao-i akhangba ama Telangana state tentetsü saka Reddy'er jabaso Jagan Mohan-i party toktsür Andhra Pradesh yimsüsütsü atema party ka tenteta liasü.

Rahul Gandhi-i 'Bharat Nyay Yatra' tenzüksü lia aser taruba Lok Sabha election atema jembitsü asoshi Brihostibarnü New Delhi nung Congress party general secretaries/ in-charges, Pradesh Congress Committee (PCC) Tirtem aser Congress Legislative Party (CLP) lenirtem senden amenba anogo nung lai Congress party nung denogo.

Delhi LG-i mohalla clinics anema bushisüngdangtsü benoker

New Delhi, Aenjeti/January 04 (Agencies): Brihostibarnü Delhi Lieutenant Governor, VK Saxena-i Mohalla clinics anema bushisüngdangtsü atema CBI nem agütsüsüla, ta benokogo.

Delhi nung AAP sorkari lapokba mohalla clinics nung pathology aser radiology tetendangba taila agir; nija laboratory tem yaritsü atema tetendangba lakh aika agir, ta tai tonglojka lir.

Lieutenant Governor indang office nungi osang ka ajanga ashiba agi, taila tetendangbatem agiba nung ajemdaker nija labs nem sen crore aika agütsüogo; Delhi nung alir sensakertem takoksa ngudakja sen crore noklang aika tajangzük ngur asütsüa akok, ta metetdaksü.

Kasa osang ajanga, temelaba malirtem mesüra non-medical staff temi shirangertem tetendangba balala agitsü atema tuyur, ta metetdaksü.

Health department-i Lieutenant Governor nem agütsüba report nunga, shirangertem registration atema taila mobile numbers amshi aser parnok dak lab tests agi, ta shia lir.

Mohalla clinics nung ozüing alema inyakba maparen jangjaba sülen Lieutenant Governor-i itemji bushisüngdangtsü atema CBI nem agütsüsüla ta shiogo.

Iba osang dak sendakba nung Delhi nung BJP lenir, Harish Khurana-i, "Taila mozü agütsüba ochimashi adokba

sülen tang ano mohalla clinics nung taila lab test agiba jungkai adoker. Delhi sorkar kübok department ajak nung lenirtemi ochimashi inyaker. AAP lenirtemi Delhi nung sensakertem anema inyakba ya sashia aitsütsü nüngdak," ta metetdaksü.

"Arvind Kejriwal-i iba dak sendakba nung jembitsüla aser Saurabh Bhardwaj (minister menden nungi) anentsüsüla, kechiyong iba ya tagizüktetla masü," ta BJP lenirisa ashi.

Delhi LG-i item tatalokba bushisüngdangtsü atema CBI nem agütsüsü benokba osangji Delhi sorkaria metetogo. AAP sorkari Delhi Health Secretary anentsüsüa akok, ta osang angazükter.



January 04, 2024 nü Jammu nung Sher-e-Kashmir University of Agricultural Sciences and Technology pur 8buba Convocation nung Jammu & Kashmir Lt Governor, Manoj Sinha-i certificates lema agütsüdang tangokba noksa nung angur.

UP nung STF-i Ram tekülem ki poksatsütsü amokmerener ana apu

Lucknow, January 04

(Agencies): Social media post ajanga bomb amshia Uttar Pradesh Chief Minister, Yogi Adityanath pokseta südaksütsü aser Ayodhya nung Ram tekülem ki poksatsütsü amokmerener nisung ana puogo, ta police-i metetdaksü.

Uttar Pradesh Special Task Force-i Lucknow nung Gomti Nagar kübok Vibhuti Khand kiyong nung Tahar Singh aser Om Prakash Mishra na puogo, ta police-i sangdong ka ajanga metetdaksü.

November aser December ita na nung Tahar Singh aser Om Prakash Mishra nati '@iDevendraOffice' handle amshia UP Chief Minister Adityanath, STF tongti Amitabh Yash aser Ayodhya nung Ram tekülem ki poksatsütsü amokmerena liasü.

Mezüng bushisüngdangba mapang nung social media ajanga amokmerentsü atema email

'alamansarikhan608@gmail.Com' a s e r 'zubairkhanisi199@gmail.Com' amshiba puteta liasü, ta kasa osang ajanga metetdaksü.

Ajisüaka item email IDs ji technical amshia jungjunga bushisüngdangba ajanga email accounts ji Tahar Singh-i yanglu aser Omprakash Mishra-i amokmeren osangji prokshi ta putet.

"Singh aser Omprakash Mishra naprongla Gonda nung alir aser tenaprongla paramedical institute ka nung inyaker. STF-i maneni iba ken o bushisüngdangdar," ta parnokisa metetdaksü.

Iba ya Muslim nungertem nem tai tongloksütsü nükjidong nung inyakba südi, ta bilemer, kechiyong taila email ID anaprongla nungji Muslim nunger tenüing lir.

Osang angazükba agi, Devendra Tewari ta ser nisung kati Tahar Singh dang email taila yanglutsü atema tuyu aser pai iba password ji WhatsApp ajanga Om Prakash Mishra den lemsatapa liasü. Lucknow kübok Naka Hindola kiyong nung aliba dokan ka nung phone tasen ana alia amokmeren osangji lemsatap, iba sülen phone anapropnglaji raksaa indok.



January 04, 2024 nü Kulgam district nung sepaitem aser kiralongrartem tsüngda khatepba sülen security sepaitemi kiralongrartem mita aodang tangokba noksa nung angur.

BJP-i ED aser CBI amshia ni pudaktsüner: Delhi CM Arvind Kejriwal

New Delhi, January 04

(Agencies): Brihostibarnü AAP tongti lenir aser Delhi chief minister, Arvind Kejriwal-i, Delhi excise policy dak sendakba nung ozüing alema Enforcement Directorate (ED)-i pa jaoker, ta metetdaksü.

Paisa, BJP-i tim masüba nung ED aser Central Bureau of Investigation (CBI) ama central agencies amshia pa pudaktsütsü meranger, ta aitsü.

ED-i tang agi tasembenbuba pa jaok ajisüaka pai ED matsüngdangi moui mapang tatsüka osangbenertem den jembidang pai, "Kü dak aliba sempet aser tashi tulutibaji ochishiba lir. Ni ED dang parnoki jaokbaji kechiba ozüing alemaar ni shiogo. Parnoki telangzüba magütsür. Ozüing kübok tim lenmang ajanga jaokra ni amaliteptsü," ta metetdaksü.

Paisa, excise policy nung ochimashi kecha mali, ajisüaka

taruba Lok Sabha election atema pai nüboyimtsü alibaji BJP-i nokdangner, ta ashi.

Brihostibarnü ED-i Kejriwal aputsüa akok, ta osang ka prokba sülen Kejriwal'er kima security tashi itshia liasü, ta AAP lenirtemi metetdaksü.

Bodhbarnü social media platform X ajanga AAP lenir aser Delhi nung Law & PWD minister, Atishi-i, "Asüngnep ED-i @ArvindKejriwal'er ki mita repringtsü ta osang angazükter," ta metetdakja liasü.

Delhi health minister, Saurabh Bharadwaj-ia X ajanga, "Asüngnep ED-i Chief Minister Kejriwal'er ki tonga oa pa aputsü ta osang angzükter," ta metetdakja liasü.

Kejriwal-i ED dang, "Iba ken o bushisüngdangba nung ni amaliteptsü melunga dang lir saka nenoki jaokba anogo nungji ni marutsü, kechiyong ibaji ozüing alema lir," ta langzüogo.



TIR YIMYIM YIMOBILEM (EDITORIAL)

DIMAPUR ROGONÜ, JANUARY (AENJETI) 05, 2024

Temelung Lemtetsüsa Alitsüla

- Tangsen Lemtur

Alima nung sensaker linüktemia takar linüktem dang sen apur. Takartema ano takaitba akümtsü atema sen apua inyaker aser sensakertema sensaker yari sen apur; kari tetemlok (interest) magii aputsür, kari tetemlok agia sen aputsür. Iba dak alia India ama aluyimertem aser sensaker nütsüng aika aliba linük nungbo sorkari sen tetemlok kecha magii sen aputsür. India nung mapang shia yipru-mopung den tzümetsüng lendong ajanga alu nung tsük aser tsünüsempongtsü balala raksaja takoksa tulu anguba ajanga aluyimertem aika sentsüh mouteti soseta asür. Aiben aluyimertem soseta asüba sülen ang sorkari takoksa angur kibongtem nem senotsü teyari agüsür, saka iba jagi takumbo malangzükter. Anungji aluyimertem aikati sentsüh aotsü bilemyonga alu nung takoksa tulu anguba agi sentsüh mouteti soseta asür. Ano külen reprangdangra asen lima nungbo asenok aikati sentsüh aotsü mebilemer, ibayongji mapang shia osangkaketem nung bank balalai sentsüh yong kiojen ajak agiadoktsü atema yimjak nung sangdonger. Asenok aikati bank nung pei nungdak yari sen apur, aikati mapang shidak nung sentsüh aoer, anungji bank-i parnok ama nembo maneni sen aputsüner; bank-i temelung lemtetsüsa alibaji jangratemtsüka lir. Ano aikati project kar inyaktsü atema sen apur, saka sen ajangzüktertsüsa meinyaketba yong sentsüh mouteter. Ano aikati sen tetemlok magii sen aputsür saka sen apurtemi mapang shidak nung sentsüh maoba ajanga medemer aser kinünger tsüngda-a tamajung ang tendaktsür. Asen nungdakba mapang apuba sentsühji temelung agüja meyipa agütsüra ano maneni temelung lemteta sen aputsütsü. Asen lima nung aliba tzümartem aika asen limai arudangbo tazüngla arur, saka dokan tilaka lapoka sen teimba-teimba aazüka takar kuma liteter, saka asenokbo aikati tilaka nungi metenzükner, anungji sen lakh aika apur maparen kar tenzüker saka azükarua melitetba ya kechi kuli ajanga?, ta kanga aroka shisadangtsüsa kümogo. Joko lanur meyirjang ka shia nungi kari dang sorkar mapa angutsü, anungji tanungba jagibo peisasa apiteta mapa balala inyaka tebok sünga alitsüsa akümtsü, ajisüaka asenoki sen tamshi meshira aser sentsüh aotsü mebilemra asenokbo tang aliba jenjang dang nungi tamajungba dang akümtsü. Sorkari tilateri business inyaktsü atema lanurtem nem sen tetemlok magii sen aputsür; item ama loan scheme rongnung Pradhan Mantri Mudra Yojana (PMMY) densema lir. PMMY scheme ya micro, small, aser medium enterprises atema lir; iba scheme kübok telemsa asem nung sen 50,000 nungi sen lakh 10 tashi aputsür. Iba dak alia Atal Innovation Mission (AIM), Multiplier Grant Scheme (MGS), Dairy Entrepreneurship Development Scheme (DEDS), Startup India Initiative aser Startup India Seed Fund ama schemes lir. Sorkari ashiba agi, Mudra Yojana scheme ajanga nisung crore 38 tajangzük nguogo. Asenoka aikati iba scheme agiteta pei poksüng atemabosa aazükterta alitsü merangtsüla, ajisüaka asenoki sen tamshi mesüra aser sentsüh aotsü mebilemra asenokbo yamaisa alitsü. Bank temibo sen tetemlok agia sen aputsür saka sorkaribo sen tetemlok magii sen aputsür, anungji pei nungdak yari sen apua maparen balala inyaktsü atema maongka tajung aika lir, saka tamasa asenoki bank/sorkari asenok dang temelung lemtetsüsa alitsüla.

OLEMSABANG

Indonesia lima nung Christmas

~ Amenla Mar, Indonesia

(Yashi adok nungi...)

1. Evangelical arogotem (Gereja Java Indonesia) nung Advent Christmas deobar anepdang nungi tenzukaChristmas benjong matong tashi jelia mission mapa inyakba kaji amangbapurtemi pei melungba tenla tenlatsu arogoi ayonger. Arogoi temtemer aser sensakertem yaritsu temeim mapa inyakba Mission project ka lir. Iba dang Indonesia oshi agi 'Jerami Basih'(Temeim Tzukjong tenla) ta ajar. Parnokitsuk tanga aliba tsukjong tepong tilala ka ka langteber iba nungji nai sen kwika tenlatetsu sen jenjang balala zuluu tzukjong nung alenteber kima kishi zungdang toktsür. Nai tzukjong ka agiteta idakji zuluu aliba sen aser ne tenung zulutsu recoder ka mena alir pa dang sayur tzukjong ji sentep ki telong tendadak sapang nung ataloka toktsütsü. Arogoi package pezu tashi yanglur :

1. Package : Rp. 30.000,- (Rs. 162/-)
2. Package : Rp. 60.000,- (Rs. 323/-)
3. Package : Rp. 90.000,- (Rs. 484/-)
4. Package : any amount

Kibong/ kejati Christmas mapang nung sensaker kibong ka sponsor asuba tangatetba. Shirnoki kowi tenlatsu melunger tenlatsu akok. Item tenlatem ya tetenlasangi shibar nem agutsur memetet aser tagizuleria shibai par nem agutsü memetet, Itemji arogo temeim mapa asütsü(tetenlartenung aser sen arogo record atema zuluu ayur). Aser kodang Christmas tonga arudier arogoi koda masur kibongtem shimteter. Sen ishiba purtem, teimbaburtem ta lemdanger parnok tia dak apetsenji lema agütsütsü. Item teyari angurtemji khristan tem dang masü saka meteta temtemertem tanga yimsü amanger asütsü akok saka item nema agutsur. Ibai tashi temeteter Asem Yisu nem bentsuba sempet nung amenloker tentet. Tzukjong tetezu tagizuker kibong temoatsü nung lia aotsuba arogoi sarasademtsuba tamaitu iba temeim mapa inyaker. Deobar pezü tashi nung Temeim Tzukjong tenla Kibong 300 tashi aliba arogo ka nung sponsor kibong 60% temelungertemi shilem agia tenlar.

2. All Christian forum Salatiga ajayanga Christmas tradition ka ayonga yimdong sua Christmas carol aor. Takuma December 16. nu 'All Christian forum Salatiga(Central Jawa) Protestant aser Catholic telok ajak meyokteper city nung aliba Christian schooltem aser Arogotem ajak nungi tamangertem tem kulemi senteper Christmas parade tuluka ayongzuka christmas carol yimdong sua jaja liasü. school-tem, arogotem nungi pei banner yanglur, group shia serial sua lemer carol jaja. Shilem agirtem merijang ka dak tali school aser arogo balala nungi represent sua jaja liasü. Lokti tuluji UKSW University (Indonesia nung tongtipang Christian University) campus nungi tenzuka city center Panchasila tashi, Panchasila ya stadium lir yangji Christmas carolji tempanga among. Carol jajaba lemanng tetsungdaji kilometer ana dak tera tali jaja.

School shia Christmas theme balala nung amenloker soshitem balala subu, Christmas otsu nung sendakba character balala eg; Mary aser Yosep, sannukertem, tashi temeteterem, Kotak tenyartem ano Kindergarten school ka main truck ana nung santa clause dress suburcar nung anidakba, karbo modern subutsutem balala puratetaa subur aser tsuraburtem parnok Jawa traditional dress subur mera keketa mena jaja liasü. City nung tongtipang junction pezü tashi nung minute ishika anener ken tena tsungsanga, parnok nungtoku traditional dance koba dang 'Tarian Naga'(dragon dance) ta ajar itemji yia liasü. Au(bamboo) agi yangluba musical Instruments koba dang Indonesia oshi agi 'Angklung'ta ajar itemji school tanurtemi tekong nung azuker iba-ji temashia longsodakja liasü. Teindoktsu aliba plastic drum, merangpong dang, plastic pong dang tulu lu koba joko tamshi majung itemji yanglushir tema tebur junga rong balala agi teba asem(drum) yanglur kar teberen nung kar tekong nung ta azuker student 40 / 500la tulu atoka atemdang benjong longsodakaja yimdong sua jaja liasü.

Khrista kuli asuba anguba kaji iba Christmas carol procession nung volunteers kari tzü bottle, sweets, sunscreen lotions, energy drinks aser amtsuk tilalatem ano Christian tracks item amala lema suisupongertem nem lema agutsü. Iba dak ji alaka Arogo tulu katibo Radio broadcast asütsü christmaseason tepiyong Christmas special presentation den message sangotsuba radioprogram tejangja kodang itemsendongtem yoktsu tejangja leaflet nung zulur lemanng nung jajaritem nem agutsü.

Arogo kar nungi kejung lanu tetsurtem volunteer sua parnok arogo sentep mapang den Christmas mapang activities indang den address zulur sentepi arutsu invite sua jaja liasü. Procession mapang tatsuka nung arogotemi mission and evangelism mapa ariteba inyakba angudang asenok lima tamangertem koda ta asungdanga ku mulung kongshia repanga liasü. Iba lima tropical zone asu nung winter aser summer mali. küm tetenzuknungi tatem tashi anogoshi tsungsang mongpu ka dang. Asen lima tatsuk mapang ama dang anogotem ajak lir. Tsungsang mopong tatsuk suaka khristiantem temelung aguja meyi ka dak tali shi shilem agia liasü. Iba Christmas procession nung jangradema repangba kaji ; tanur tila perambulator nung mener tsuraburtemi nunger, senior citizen karbo wheel chair nung mener lokti par kiyong ajang dang minute ishika danga Yisu kuli sua procession nung jajaba angu. Khristiantem rongnung kanga telungjem aser temeimteb tulu aliba ajangshi. City nung alirtem Christian masuba purtem iba carol party repangtsu asoshi lemanng lenjembalala nung nokdaker repanga atar aika angu. Ibai Yisu asoba osang saongkoksuba anogo tajung ka liasü. kechiaser Yisu mamanger lima nung Khristiantem telongjem nung Yisu khrista ajungketa sentsuwangshidaktsubaji jangratemtsu anogo ka liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Goa nung pastor kati arasenba mapa inyaker ta tai tonglokja apu



Goa nung Mapusa Police-i Pastor Dominic D'Souza court nungi anir aodang tangokba noksa nung angur.

January 04, 2024: Goa state nung pastor kati arasenba mapa inyaka Hindu nung ka Khristan kümdaktsüsü merang, ta tai tonglokja police-i apu.

Nisung ka tenüing agi, Balasubramaniam Vadivel-i police dang, Pastor Dominic D'Souza-i pa Khristan kümdaktsüsü merang, ta tai tongloktsüba nung ajemdaker police-i pastor apu, ta January 3, 2024 nü osang ka ajanga metetdaksü.

January 1, 2024 nü police-i Five Pillar Church nung pastor D'Souza puogo, ta police inspector Shitakant Nayak-i metetdaksü.

"Pa anema ken o teku benoka lir," ta paisa metetdaksü.

Pastor-i tamangba yimsü balala amangertem tsüngda tsükchitep adokdaksüsü merang aser yimsü nung ajemdaker tangar melung yirutsüba den külemi ozüing alema amokmeren, ta pa nem tai tongloktsü.

Drugs and Magic Remedies (Objectionable Advertisements) Act 1954 kübok pastor anema ken o benoka lir.

Police-isa D'Souza kinüngtsü, Joan Mascarenhas den Five Pillars Church nung züngsem pongu anema-a ken o benokogo. Iba Arogo ya Mapusa kübok Siolim yimdak lir.

Vadivel-i police dang, pastor D'Souza aser pa kinüngtsü nati kü dang Hindu yimsü toktsür Khristan yimsü agizükang ta ashi, ta metetdakja liasü.

"Parnoki ni Khristan kümdaktsüsü atema merang," ta paisa metetdakja liasü.

December 31, 2023 nü Vadivel-i Five Pillars Church semdangba mapang pa dang Hindu yimsü dak sendakba ajak temang nungi agienang ta ashi, ta paisa metetdaksü.

Iba mapang nungji pastor kinüngtsü pa merüktetsüsü atema pa dak tzü shiloktsü, ta paisa ashi.

Osangbener den jembidang Siolim yimdak St. Anthony Church nung putir, Socorro Mendes-i, "Küm ishika tejaklen D'Souza-i 'healing ministry' ka tenzüka liasü. Iba Arogo nungji kechisa inyakerar onoki memetet," ta metetdaksü.

Five Pillars Church nung

züngsem ajakji sensaker kibongtem nungi lir aser sensaker Hindu nungertemia iba Tenla kiji semdanga Hindu yimsü metoktsüyonga parnoki Laishiba azünger, ta Mendes-i metetdaksü.

2022 küm North Goa district collector, Sanjeev Desai-i Five Pillar Church nungji ozüing alema yimsü meyipdaksür, ta shia iba Tenla ki shibangja liasü, ajisüaka state High court obendang ka ajanga tanaben iba Tenla ki lapokdakja liasü.

Pastor D'Souza anema ken o benokba sülen 2022 küm May 27 nü pa pua liasü.

1533 küm Goa diocese amenokba sülen Goa ya Asia nung Catholic mission inyaksü atema tiyongtsü ka aküm. Iba mapang nungji Goa diocese jurisdiction ji South Africa nung aliba Cape of Good Hope nungi tenzüka China aser Japan tashi liasü.

Mapang ka nungbo Goa nung Khristan nütsüing aika liasü ajisüaka tangbo nütsüing million 1.5 aliba state nung nütsüing shilem 25 dang Khristantem lir aser Hindu nungertembo nütsüing shilem 65 shi lir.

ANOGO ABEN TSÜNGREM DEN

Telemtetba


Parnok chiyongzüker külen Yisui Simon Peter dang ashi, "Yona chir Simon, item dangi tali nai ni meimer asü?" Yohan 21:15.

Asenoki Pa tsüngdang tamakok angudang Yisui tesüngmangtsü lemanng ka nungi Pai agizüker! Pai asenok luja mejembir. Pai asenok maitsür. Asenok tesashiba tendangtsü asoshi asenok telemtetba akatsü Pai masüngdang. Iba melen Pai asenok ajar aser asenok Pa meimba akangshitsü Pai asüngdang.

Peter kodang nütsüngtem den atsüki nungi jena ao pai pa masterba tsüngdang kanga mejungi tamakok angu. Tesülen, pai yimjak nung pai Yisu magizük. Yisu kanga dang lendongpang nung alidang Peteri Yisu nütsüing ka sütet asübo ta pa süngmangseta alitsü.

Na küm tasen ka tenzükdang nai lemanng aisü nung Yisu tsüngdang tamakok nguogo ta sasa bilema alitsü südi. Na temulung lemtetta mesüi arur alitsü akok. Pai ne den jembiba nung nai tashi mangai arur alitsü akok. Ne taküm yimya nung Pa magizüki arur alitsü akok. Yisui Peter ajaba ama Pai na ajatsü. Pai na asoa meblemetsü. Pai na mezüngmeshia masütsü. Pai ne dang nai Pa meimba meyipa reprangshitsü asüngdangtsü. Pai Peter dang asüngdang, "Nai ni meimer asü?" Peteri ama, "Au, Kibuba" ta langzüra, Pai pa tenangzüka na asoshi akangshitsü. Nai atangji Pa meimra, nai Pa dang tashi angatsü (Yn. 14:15). Yisui ne tekümtetba menüngdaker, na bendanga agütsüshitsü menüngdaker mesüra iba küm merangshitsü nangzüksü menüngdaker. Yaküm nai Tsüngrem dang tashi angatsü renemba nung temulung lemteta melitetti arua lira, iba jagi taküm küm takok mangutsü. Yisui ne temeim asüngdang. Nai atangji Pa meimra, iba küm ne mapa Pai aginüba ama alitsü.

Reformed University Fellowship tentetsang, Mark Lowrey süogo



Mark Lowrey

January 04, 2024: Reformed University Fellowship (RUF) tentetsang aser Great Commission Publications nung inyaker, Mark Lowrey mapang talangka cancer tashidak agi shirangba sülen alima nungi pilaogo; pa arrshi küm 78 liasü.

America nung aliba Presbyterian Arogo indang web magazine ByFaith Online-i sangdong ka ajanga, Lowrey mapang talangka cancer tashidak agi shiranga aruba sülen süogo, ta metetdaksü.

Pa dak cancer mesenji tebok nung aliba shilem aika nung prokshia liasü.

"Pai pa kinüngtsü, Priscilla den chirnur ana- Leonard aser Elizabeth nung toktsür süogo. 1970s mapang nung Priscilla InterVarsity Fellowship nung inyakba mapang tena ajurutepa kibong küma liasü," ta kasa osang ajanga metetdaksü.

"Pa ya Tsüngrem tenzüker tajung ka liasü. Pai küm 50 tashi tenzüka ya Tenüngsang Ken 90 nung 'Ne kilir dangi Nü mapa

aser Nüü chirtem madang Nü sentsüwangshi jungkai adokdakjang. Aser ozü Tsüngrem Kibuba temelung achiba onok madak liang. Aser onok madak onoki inyaktetba mapa tashi itdakjang. Au, onoki inyaktetba mapa Nai kümtetdakjang' ta Mosa-i mepishiba atangji nung ataloktsüba lir," ta kasa osang ajanga metetdaksü.

Mark Lowrey ya 1945 küm Hattiesburg, Mississippi nung aso. Pai Vietnam War nunga shilem agiba sülen Jackson, Mississippi nung aliba Reformed Theological Seminary (RTS) nung theology zünga liasü, ta kasa osang ajanga metetdaksü.

Pa 1978 küm ordain asü.

Reformed Theological Seminary (RTS) nung azüngdang University of Southern Mississippi nung pa leniba nung campus fellowship agia liasü. Iba mapang nungji pai Reformed University

Fellowship (RUF) tenteta liasü.

Lowrey-i talisa ordained ministers discipleship, sayutsüngiba aser tanela tsütsü anepaluba nung rangloker inyak.

1983 küm pa Atlanta-i oa PCA headquarters nung inyakba ajanga Reformed University Fellowship tashi itdaktsü.

Pa küm 25 tashi RUF nung inyakba sülen 1996 küm nungi Great Commission Publications nung inyak; iba mapang nungji pai Khrista tiyongtsü sädaktsüba curriculum renema liasü.

Pa lenisüba kübok Great Commission Publications ya PCA nung Arogo 1,000 dak tema atema denominational curriculum ka kümdaktsü aser 2021 küm pa Great Commission Publications nung executive director aküm.

Twitter ajanga nisung aikati pa asüba atema mangyim jashi lemsatepba den külemi pa nem tetushi agütsüogo.

Lowrey-i PCA nung kanga nendaka inyaker aser pa ajanga yimsü dak sendakba shisaliok aser tenzüka wadang nung temelenshi tulu adok, ta aikati pa nem tetushi agütsü.

Reformed Theological Seminary nung chancellor, Ligon Duncan-i, "Mark Lowrey Kibuba den külemi kidang lir. Pa ya tamalen @ReformTheoSem nung azünger ka aser @FPCJxnMS nung John Reed Miller'er jala kinüngbu; pa@RTSJackson nung student asüba mapang nung pai RUF tenteta liasü. Pai küm aika @GCP_Publication nung tenzükgogo," ta metetdaksü.

Pa den tatembangbuba asüpila sentong January 6 nikongdang 2:00 ako nung Westminster Presbyterian Church, Atlanta nung agitsü aser January 13 nüa nikongdang 2:00 ako nungi Hattiesburg, Mississippi nung aliba First Presbyterian Church nung agitsü.

AO OSHI ANGAZÜKDAK:
TANÜ ANGAZÜKTSÜBA OJANG



Shimtet

(v) aika rongnungi agitetba (selected)

* Senotsü ketdangsütsü atema Rongsenba shimtet.

Shimtok

(v) tamajung agiteta endokba (discard)

* Jang nungi tsük shimtok.

OLONG PAITEP # 6657

1		2				3		4		5
				6						
	7		8							
9					10			11	12	
			13		14	15				
16					17			18		
			19		20					
21		22								23
24										

TIPIEN

- 1. Saku - (4)
- 6. Songjen - (7)
- 7. Mall/Tazung - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzünglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüng kasa jatepba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anügdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. ___ tatsu - (3)
- 12. Tebur kidong aser zünga kasa tsüngda jatepba - (4)
- 14. Pela agizükba tapu ka - (5)
- 15. Tenüng atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 6656 TELANGZÜBA

TIPIEN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso,

LANGTSÜNGLEN :

- 1. Alimang, 2. Pongen,
- 3. Samaru, 4. Nün, 6. Pio,
- 9. Nügdak, 10. Yongya,
- 11. Kongro, 13. Ora, 14. Ata.

SOR KÜM ANA AJUNGER

Tebosang Remrar Tzüdir.
Tsüngrem tenüng asanger.
Taochi nung inang,
Nü mulungjang nung aji remang aser temeim nung tera yangdakjang.
Tangatetba nung inang,
Kongsang aika adoktsüsa aser nai inyakba aser jembiba nung temoatsüba süang.
Ajemalu nung inang,
Asensor dak aria bilemba tanela indakjang, telemdang makai nai inyakang.
Shisatsü nung inang,
Kechi nung ochi lir nai bendenang, O nung nai züenang aser itemji nai lemsatetbang.
Tanü na inang,
Khrista dak teti inang...
- Oja, Oba aser Temeimertem ajak nungi-



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Tripura nung solar micro grids amenoktsü atema Centre-i sen crore 81 agütsü

Agartala, Aenjeti/January 4 (Agencies): Tripura nung solar micro grids amenoktsü atema Centre-i sen crore 81 sanction sütsüogo.

Tripura kübok kinük nung aliba tesemtem nung kibong 9000 dak tema nem electricity agütsütsü atema solar micro grids 274 amenoktsü.

Solar micro grids koba non-conventional source ajanga power adokdaksütsü nükjidong nung amenoktsü ali, item solar micro grids tem ya Dhalai, Unakoti aser South, West aser North Tripura district tem nung amenoktsü.

Ministry of Development of Northeast Region (DoNER)-i sen crore 81 sanction sütsüogo, ta ketdangsürtemi Brehostibarnü metetdaksü.

Tesem ka nung nütsünyongsük dak ajemdaker solar micro grid tem indang capacity 2 KW nungi 25 KW tashi asütsü.

PELABA LEMSATEPER



Aso : 1930 - Asü : 29.12.2023

Onoki teti meima aliba temeim tsürabur **Lt. Katensangla Nokdir (Molungyimsen)** wife of Lt. Imsowar Tzüdir, la shiranga yipden nung alidang nungi akümüli wadang tatem tashi nung Molungyimsen aser Luyong Arogoi anir yimten yimsüsür aser yimtsür yimer, temba tinu shirnokisa nübu, rongsen aser sarasadem nüktzü agi onok den yaritepogo nenok ajak dang kanga pelaba metetdaksür.

Nenek temeim mapatem asoshi pelar. Asen tulusang Tsüngremi nenok ajak talubosa moajang ta onoki sarasademtsür.

-Temeim Chirnur, Semchir aser kinüngertem.

Kuki-Zo teloktemi lenden lima nung AFSPA tanaben benokshitsü akhanger

Imphal, Aenjeti/January 4 (Agencies): Mepetmesü adoker aliba Manipur state nung Kuki-Zo teloktemi state kübok lenden lima nung armed forces special powers act (AFSPA) tanaben benokshitsü takhangba agütsüogo.

Manipur nung Kuki-Zo teloktemisa state kübok tenem lima nungi state police agintsü takhangba agütsüogo.

Committee on Tribal Unity (CoTU) aser Indigenous Tribal

Leaders' Forum (ITLF) nati union home minister Amit Shah dang arrtsü nung aliba Moreh jila aser iba temeket nung tribal tem aliba tesemtem nungi state forces agintsü aser lenden lima nung AFSPA benoktsü takhangba agütsüogo.

Manipur nung Kuki kin tenüng nung nokdakba lokti tentet CoTU aser ITLF nati state force-i tashiyim amshiba anema ghonda 24 longkak aitba sentong ka ayongzüka liasü.

Tawa tesem kar nung azütokshi lendong atalokba sülen Manipur nung ano tensa mejungi kümer lir.

Taoba mapang Manipur chief minister N Biren Singh-i, state nung tensa mejungi küma aoba atema shisabulua bilemba lemsatetpogo aser mangatetpog adokdaksütsü atema jenjang agirtem sorkari merenshitsü ta tekümdangtsü metetdaksüba den AFSPA tanaben benokshitsü akok ta ashi.

ODOP Awards 2023 nung Meghalaya tasembuba jenjang nung liasü



Meghalaya Commissioner & Secretary Vijay Kumar D -i ODOP Awards 2023 agizükba noksa nung angur.

Guwahati, Aenjeti/January 4 (Agencies): Department for Promotion of Industry and Internal Trade (DPIIT)-i ayongzüka Pragati Maidan, New Delhi nung agiba 'ODOP Awards 2023,' nung Meghalaya second runners-up liasü. Iba naroküm ya state-i One District One Product (ODOP) inyakyim ajungkettsü atema bendanga agüja inyakba atema agütsüogo.

'Aatmanirbhar Bharat Utsav' aser ODOP Awards ceremony ya External Affairs Minister S. Jaishankar-i lapokja liasü. Iba naroküm ya state, union territory, district aser Indian mission temi ODOP inyakyim ajanga 'Aatmanirbhar Bharat' nükjidong

ataloktsütsü asoshi jenjang tajung agiba atema agütsür.

Iba naroküm anguba sülen Meghalaya Chief Minister Conrad K Sangma-i, "iba naroküm ajanga aluyimertem aser teka mapa balala inyakertem ajungmesotsü, shirnok parnoki züsentetba chitongtsü aser yanglutetba osettem national aser international jenjang nung sayatsü asoshi meranga inyakdar. ODOP Awards nung onoki takok tajung ngutetba ya tasa junga asaba, mission mode sentongtem, brand balaka yanglutetba, Geographic Indication (GI) tagging aser shishilembatsü asoshi tasa tajung

asatetba ajanga lir," ta ashi. Chief Minister Sangma-isa, state-i merangdanga inyakba reprangtetba atema Meghalaya sorkari DPIIT aser Ministry of Commerce dang kanga pelaba lemsatetpa liasü.

Meghalaya Commissioner and Secretary Vijay Kumar D shibai state sorkar tenüng nung iba naroküm agizüka liasü pai ashiba agi, "Meghalaya nung aliba nüburtemi aremzüka meranga inyakba ajanga iba naroküm ngutetogo. State nungi tangar dang nungi balaka oset balala sayua India tangar dak memetaloki alitsü atema jenjang agiba mapang teyari agütsütsü asoshi onok bendanga agütsür lir.

Nisung 84 poksetba atema Iran leniri telangzüba agütsütsü nangzük



Tehran, Aenjeti/January 04 (Agencies): US-i tepsetba Qasem Soleimani asüba anogo bilemteta nüburtem adenshia alidak bomb pokloktsüba asoshi Iran indang Supreme Leader Ayatollah Ali Khamenei-i telangzüba tesashi agütsütsü nangzük.

Iran south tsütsü Kerman yimti nung iba lendong atalokba nung nisung 84 asü aser tali ang yiru.

Iba lendong nung nisung 95 asü ta sangdonga liasü, saka Iran indang emergency services tekolakbai Brehostibarnep melenshija liasü.

Tang tashi telok kati iba azüdokshi tenüng agia mali.

"Telangzüba tesashi agütsütsü ta taochi maka mapa tamajung inyaker temi metettsüla," ta Khamenei-i Bodhbar nikongdang sangdong ka nung ashi.

Tir Ebrahim Raisi indang political deputy Mohammad Jamshidi-i Israel aser US tenüng asener.

Ajisüaka iba lendong nung Israel dena aliba mangur ta US-i ashi aser Washington kecha nunga shilem magi ta ashir.

Arab separatists aser Islamic State (IS) ama Sunni jihadist telok dak temulung melemtetib akumtsü akok, kechiaser Iran nung civilian aser security forces dak item yagi lendong agüja arur.

Kasa mapang IS yagi Iranian general Qasem Soleimani asüba pela agizüka liasü, kechiaser par militias temi parnok den Iraq nung küm aika rara aru.

Iran nung supreme leader sülenbo Soleimani ya tashi tulutiba lenir ka ama züngshia aru aser 2020 küm kidanger Iraq linük nung US drone agi tepset.

Lebanon nung Iran-i yariba Palestine nung telok Hamas indang tanishir ka tepseter region nung tensa tamajungba kumer alidang Bodhbarnü Kerman nung iba lendong ya atalok.

Iranian state TV ajanga video prokshiba nung nisungtem telok tulu adenshia lenmang nung Qasem Soleimani noksa aketba banner amer jaja aodang

bomb ya apok.

Bomb ka apokba sülen nisungtem aretepa tetsübo nung jenshiba video nguogo.

Iranian media ajanga ashiba agi, mezüngbuba bomb ya nikongdang 3:00 ako (par mapang) meta Kerman tezülen Saheb al-Zaman mosque meketa aliba Garden of Martyrs cemetery nungi metre 700 shi pilar apok.

Minute 15 shi lir iba leper nungi kilometre ka shi pilar tanabuba bomb ya apok, koba bomb mezüngbuba apokba nungi jena aor dak tenük yoker pokdaktsüba liasü, ta parnoki ashir.

Bomb anaprong ya security checkpoints alema orr apok, ta Kerman province indang governor-i state news agency Irna dang ashi. Ajisüaka paia bomb ya remote amshia pokdaktsü asü takum bendanga agütsür pokdaktsüar mejangja ta ashi.

Bomb tanabuba apokdang timba asü aser yiru aser iba lendong bushisüngdang tenzükgogo, ta Interior Minister Ahmad Vahid-i ashi.

Tir Ebrahim Raisi-i iba ya tasü mait mapa lir aser Iran sempaba mapa tamajung inyaker kiralongrar temi lir ta ashi. UN Secretary General António Guterres-i iba azüdokshi aitsü aser Iran nung mangyimer kibong, nüburtem aser sorkar den asükhü lemsatepa liasü.

European Union-ia tematiba

jenjang nung iba lendong agütsüba aitsür aser Iran nüburtem den külemi mang ayimer ta ashi. Russia Tir Vladimir Putin-ia iba lendong aija liasü.

Gulf linük balala aser Turkey-i iba lendong aitsü aser China Tir Xi Jinping-ia Iran tir dangi asükhü osang ka yoka liasü.

Hamas ama tashi tulu aliba aser Iran-i yariba Lebanon nung Hezbollah movement leniri asürtem ya linük asoshi Soleimani-i aniba kasa lenmang nung asü, ta ashi.

Revolutionary Guards indang Quds Force tanishir ka ama region nung Soleimani ya Iran sentong yanglur ka liasü.

Quds Force ajanga miim mapa inyakra, Iran den tesendaktep tajung aliba sorkar aser Hezbollah aser Hamas ama telungpur telok nem senotsü, nok-nü, itdangiterba aser osettsüset balala agi teyari agütsüba nung pa tanishir liasü.

2020 küm drone amshia amaktsü totuyuba agütsüsang US Tir Donald Trump-i Soleimani ya alima ajunga nung kiralongrar tamajungtiba ta shia liasü aser pa lenisüba kübok par sepaitemi tesüiba küm 20 tsüngta American civilian aser sepai noklang aika tepsetogo ta tai tongloktsü.

Iba sülen US-i kiralongra mapa inyakra ta Iran sorkari tai tongloktsü aser Trump aser danga ketdangsurtem aputsü totuyuba agüja liasü.

Israel-i Khan Younis nung kibong ana nungi nisung 14 tepset

Gaza City, Aenjeti/January 04 (Agencies): Israel-i Khan Younis anasa ki ka amakdang kibong ana nungi nisung 14 asü.

Iba kidang bomb pokloktsüba ajanga jana pokshiba nungi anasa al-Mawasi evacuation zone nung Palestine nung aika yirua liasü.

Israel mitkar temi nüburtem dang al-Mawasi evacuation zone nung jenoktsü totuyuba agüja liasü, saka Bodhbar aonung tepiyong iba tesem anasa bomb poklokja liasü.

Iba kibong ana nungi züngsem ajak asü aser

asürtem rongnung tanubosang ya arishi küm pungo liasü. Asürtem timba arishi küm ter tekübok lir.

Ano Khan Younis dangalen aser central Gaza nung nisung tepsetba osangtem lir, aser Deir el-Balah south tsütsü kanga sashia amaker.

Kasa mapang Khan Younis nung aliba Palestinian Red Crescent Society HQ nung ano maneni amak aser iba mapang nisung ka asü aser tenet yirua liasü.

Ano Israel-i occupied West Bank kübok Tulkarem nung

MULUNGNEN O



Late Mrs Pangerungla


02:12:1963 - 30:12:23

Nü teyari agi onok tashi itdaksü, Nü o tajung agi onok mulung sunepsü aser Nü temeim agi onok alitsü

Ozü taku marok ajemdang nenoki temeim sayuba atema pelaba lemsateper. Nenok temeim ajanga onok mulung anisüngzük nguogo, tepang agi meshiteti pelar aser onoki kodanga mamadoktsü

Tsüngdong aruaki nenok majurutetaka takarsang Tsüngrem-i nenok Kija, Kibong aser Lokti maneni moajang ta ozü sarasadem.

I Akang Longkumer aser Kinungertem.



सत्यमेव जयते

PUBLIC NOTICE

HIGH LEVEL COMMITTEE - ONE NATION, ONE ELECTION

Linük nung elections mapang ka nung agitsü asoshi tang aliba legal administrative framework nung tapet temelenshi atema nüburtem nungi tebilemba ashitsü sangdonger

Government of India-i High Level Committee- One Nation, One Election vide Gazette Notification No. 211 dated **September 2, 2023** (<https://onoe.gov.in/onoe-gazette-notification>) ka tenteta lir. Terms of Reference nung aliba ama teti elections mapang ka nung agitsü atema iba Committee yagi tapet ozüng aser administrative framework yanglutsü, Constitution nung nüngdakba amendments aser sendaka aliba election laws jangjatsü, common electoral rolls yanglutsü, EVMs/VVPATs ama logistics renemtsü atema recommendations agütsütsü.

Committee indang Terms of Reference aser Expert bodies indang report tejangja ya website: <https://onoe.gov.in/onoe-reports> nung angutsü. Linük nung elections mapang ka nung agitsü asoshi tang aliba legal administrative framework nung tapet temelenshi atema nüburtem nungi tebilemba ashitsü sangdonger. **January 15, 2024** tashinung agizükba suggestions tem asadangsü atema Committee nem agütsütsü. Suggestions ya <https://onoe.gov.in> nung inoktsütsü akok mesüra sc-hlc@gov.in dangi email asütsü akok mesüra post ajanga tsünglanglen agüja aliba address dangi yoktsü akok.

SECRETARY
High Level Committee - One Nation, One Election
 Jodhpur Officers Hostel, (Block No. 9)
 near National Gallery of Modern Arts
 'C' Hexagon (India Gate Circle)
 New Delhi - 110003

CBC 24301/11/0003/2324

Iran nung supreme leader sülenbo Soleimani ya tashi tulutiba lenir ka ama züngshia aru aser 2020 küm kidanger Iraq linük nung US drone agi tepset.

Lebanon nung Iran-i yariba Palestine nung telok Hamas indang tanishir ka tepseter region nung tensa tamajungba kumer alidang Bodhbarnü Kerman nung iba lendong ya atalok.

Iranian state TV ajanga video prokshiba nung nisungtem telok tulu adenshia lenmang nung Qasem Soleimani noksa aketba banner amer jaja aodang

aliba Nur Shams refugee camp amakdang Palestine nung nisung 17 yiru, ta Palestine Red Crescent Society ajanga ashir.

Israel sepaitemi apudang azükba mesüra asüngdangyaba mapang nisung 13 teret raksa, ta ashir.

Osangtem ajanga ashiba agi, Israel sepaitemi Palestine nung tebur 400 jungnüa apu aser ki ajak sema asüngdangyaa jajar.

Iba refugee camp meita aoba maparen ya Mongulbar ayatirm matongdang nungi

tenzüka liasü.

Ano Israel nung osang kar ajanga ashiba agi, Mongulbar nikongdang Lebanon yimtiba Beirut nung Hamas indang office ka amakdang Hamas indang deputy chief Saleh al-Arouri tepsetba ya drone ajanga masü saka Israel fighter jet nungi guided missiles trok khaloktsüba nung tepset.

Missile trok khaloktsüba nungi anati al-Arouri aliba ki nung kongshi. Missile shia tuozük seret 100 liasü, ta osang ajanga ashi.

Ranji Trophy atema Nagaland team sangdongogo



Dimapur, Aenjeti/January 4 (TYO): Ranji Trophy 2023-2024 nung Nagaland Senior Men's team mezüngbuba asaya January 5 nü nungi tenzüka Nagaland Cricket Stadium, Sovima nung Hyderabad den asayatsü.

Nagaland nung cricket asaya meimertem asoshi state team asayaba reprangtsü asoshi maongka tajung asütsü, kechiyong January 1 nü nungi tenzüka asayatsü aliba mezüngbuba asaya aser tatembangbuba asaya koba February 2 nü nungi tenzüka Arunachal Pradesh den asayatsü lir, iba asaya ana ya Nagaland Cricket Stadium, Sovima nung asayatsü.

Kasa mapang nung Under-19 Nagaland team-i January 1 nü kasa tesem nung Cooch Behar Trophy finals (plate group) kokogo.

Ranji Trophy ya Board of Control for Cricket in India-i ayongzüka asayaba premier domestic first-class cricket championship lir. Iba

asayamung 1934 küm nungi asaya arudar.

Taküm iba asayamung nung Nagaland team Plate group nung asayatsü aser Elite subgroup ajaka nungi tatembangbuba jenjang nung tembangba team relegate asütsü aser Plate group finalist anaprongla taruba season Elite group-i promote asütsü.

Nagaland Senior Men's team state 3 nung oa away asayatem asayatsü aser kidang asaya ana asayatsü.

Mezüngbuba Ranji Trophy asaya asem atema Nagaland team:

- Jonathan Rongsen (C)
- Imliwati Lemtur
- Sedezhalie Rupreo
- Tahmeed Rahman
- Nagaho Chishi
- Hopongkyu Sangtam
- Khrievitso Kense
- Sepichem Jingru
- Joshua Ben Ozukum
- Yugandhar Singh
- Nzanthung Mozhui
- Vishal Sahani
- Karan Tewatiya- Guest

- player RS Jaganath Sinivas- Guest player
- Sumit Kumar- Guest player
- Support staff: Shatilo Kent- Team manager
- Muralidhar R- Head coach
- Arzoo Raj- Asst. coach
- Kechisen Keppen- Asst. coach

Ranji Trophy 2023-24 (Plate group fixture)

1. Nagaland vs Hyderabad: 5th - 8th Jan. 2024 | Nagaland Cricket Stadium
2. Nagaland vs Mizoram: 12th - 15th Jan. 2024 | Gokulbhai Somabhai Patel Stadium, Nadiad
3. Nagaland vs Meghalaya: 19th - 22nd Jan. 2024 | MCA Cricket Ground, Polo Ground, Shillong
4. Nagaland vs Sikkim: 26th - 29th Jan. 2024 | SICA ground, Rangpo
5. Nagaland vs Arunachal: 2nd - 5th February. 2024 | Nagaland Cricket Stadium.

WFI taruba hopta okadak ken o benoktsü

Aenjeti/January 4, 2024 (Agencies): Wrestling Federation of India (WFI)-i parnok Sports Ministry-i suspend sütsüba anema taruba hopta okadak ken o benoktsü aser January 16 nü Executive Committee senden ka ayongzüko.

National Sports Code aser WFI temzüng anema inyakangshi ta shia sorkari December 24 nü shimba lokti tentet ya suspend süja liasü.

WFI-i ashiba agi, parnoki parnok suspend sütsüba aser IOA-i wrestling asaya achaayangtsü atema shima

toktsüba ad-hoc panel magizüker ta shiogo.

"Inyakyim ajak tatongi benoka inyakangshiba Federation ka nüngdaker. Onoki taruba hopta okadak ken o benoktsü. Onok suspend sütsüba ya magizüker kechiyong onok democratically shimba lir. Onoki January 16 nü Executive Committee senden ka ayongzüko," ta WFI tir Sanjay Singh-i PTI dang ashi.

Singh-isa, ad-hoc panel yagi inyakyim shitak benoka minyaktetsü ta ashi. "Zagreb Open atema team koma sangdong aji nenoki nguogo.

Weight category pongu nungbo asayar mali. Federation tejangja ka mali tashibo yamai ataloktsü. Category kar atema asayar melira parnok temelener kechiba meshim.

"Federation ali tashibo India nung asayatem weight category ajak nung asayaogo aser Asian Games nung asayaba kasa team shimba tetezü ya kechi. Tanga tetokteperitem mali asü," ta Singh-i ashi.

Kasa mapang nung WFI source kati ashiba agi, Executive Committee senden amentsü atema December 31 nü osang agütsür liasü.



India tetsür hockey team Birsa Munda Astroturf Hockey Stadium, Ranchi nung Olympic Qualifier masaya tsüngda warm-up session mapang tangokba noksa nung angur.

Nagaland Wushu Association-i technical training ayonger

Kohima, Aenjeti/January 4 (TYO): Nagaland Wushu Association-i ayongzüka January 9 nungi 11 tashi technical training agitsü. Session atema shisalen agütsürtem ya Manipur nungi asütsü.

February 12 nungi 17 tashi 3buba Nagaland Olympic asayatsü aliba temulungdang yur iba session ya ayongzüko, kong wushu-a medal atema asaya rongnung ka lir, ta association-i metetdaksü.

Technical training ya, district balala nungi asayatem renemshia atadaksütsü atema züngoksema aliba district ajak nungi ketdangsurtem training agütsütsü atema ayongzüka agitsü.

Training mapang Taolu aser Sanda discipline tem ayimjema agitsü aser training nung shilem agirtem nem qualified certificate ka agütsütsü aser iba ajanga parnok ya Nagaland Olympics nung ketdangsurtem atema temsüa kümdaksütsü.

Kasa mapang nung district association tem dang technical training atema January 5 nü

tashi nungbo ketdangsur anana tenüng agütsütsü mepeshia metetdaksügo. Osang tejangjaba agitsü atema NWA ketdangsurtem den item number: +919915580774/+919863238620 ajanga t o n g t e p r a t e p t s ü metetdaksügo. Training mapang instructor temji Manipur nungi Maibam Premkumar, Mayanglambam Bimoljit, aser N Ibungochoubi nung asütsü.

Maneni association-isa, taruba Nagaland Olympic nung asayatsü bilema aliba asayatem dang pei district ajanga tenüng züngoksemsü metetdaksügo. Iba asayamung nung asayar tajungtiba Nagaland tenüng nungi northeast Olympic nung asayatsü atema maongka agütsütsü, koba state nung ayongzüka asayatsü lir. Nagaland Olympic ajanga shimertem nem northeast Olympic nung gold medal angutsü nükjidong nung specialized training agütsütsü, Nagaland Wushu Association GS, Akhozo-i metetdaksü.

Nice Defender Youcef nem ita 8 atema tenokdangba agütsü



Aenjeti/January 4, 2024 (Agencies): Nice defender Youcef Atal-i online ajanga Yihuda nung anema (anti-Semitic) osang lemsatepba atema ita ti suspended prison sentence agütsügo aser iba den euro 45,000 senchi chia liasü.

French media sangdong balala ajanga ashiba agi, tesempatep osang prokshiba atema pa aia aliba ngutetogo. October ita Israel aser Hamas na tsüngda mangatettep adokba ajanga alima ajunga mesüngjemteti aliba mapang pai anti-Semitic osang ka lemsatepa liasü.

Atal, shiba Ligue 1 club Nice nungi asayar pai follower million 3.2 aliba pa indang Instagram account nung October ita Hamas puri Israel amakba sülen mapang tatsüka lir video ka lemsatepa liasü.

Arishi küm 27 tain asayar shibai mapang tatsüka dang lir iba video ya delete asü aser

tatok meshia liasü, pa ya club-i suspend sütsü aser prosecutor temi kiralongrar inyakyim shitak kümdaksütsü merangba ken o ka ta bilema bushisüngdang tenzü.

Ajisüaka video reprangba sülen bushisüngdang ya masü aküm aser asayar dang ken o ashishia liasü. Tamangba yimsü dak ajemdaker tesempatep adokdaksütsü merangba atema pa aija liasü.

International League against Racism aser anti-Semitism (Licra) aser Jewish Observatory of France-i asayar anema ken o benoka liasü.

Pa judicial taziokba kübok lir aser professional football football asayatsüba dak alaker bendanglen mesenzütsü atema tenokdangba agütsür liasü.

Iba post dak sendakba nung Atal nem French soccer league-i asaya tenet atema tenokdangba agütsür liasü.

BILEMDANGANG
"Mapa medenra tebilemba tajung ajak amajok."